

WAMISHIONARI WATANGULIZI WAZAWA AFRIKA MASHARIKI

Re-arranged and translated by Pastor Stephen Letta

Levi Napagi, (1956 – 2002)

Levi Napagi ni mwinjilisti wa vitabu na mhubiri mlei aliyechangia kuwepo kwa Misheni ya Utume ya Waadventista nchini Uganda.

Levi Napagi alizaliwa mnamo Desemba 18, 1956, huko Bugusege, wilaya ya Sironko, Kaunti Ndogo ya Buwalasi nchini Uganda. Alizaliwa na Wanzira Elian na Nubuyobo Christine. Baada ya kumaliza shule ya sekondari, alijiunga na Taasisi ya Ufundi ya Moyo katika wilaya inayopakana na Sudan Kusini. Baada ya kumaliza mafunzo yake, wakati wa utawala wa Idi Amin, Napagi alikimbilia Juba ambako alitafuta kazi mwaka wa 1978. Tayari alikuwa na ujuzi mdogo wa Uadventista na alifurahia kueneza ukweli kidogo alioujua kwa wengine hata kabla yeye mwenyewe hajabatizwa. Anaonekana kuwa miongoni mwa waongofu wa kwanza wa kazi iliyofanywa na mwinjilisti wa vitabu, Bi David Ogillo.

Mnamo Septemba 1979, mchungaji Mtanzania, David Ogillo, aliwasili Juba kama mmishonari. Bi. Ogillo alikutana na Napagi sokoni na kumwalika kwenye eneo la Waadventista. Mkutano huu wa furaha ndio uliopelekea Napagi kubatizwa baadaye. Wakati wa mahojiano yake ya kwanza ya kazi katika kampuni ya utengenezaji wa mashua, hakuogopa kuwaambia imani yake kuhusu Sabato. Meneja wa kampuni ya kutengeneza mashua alimjulisha kuwa hakuna mtu ambaye angemwajiri kutokana na imani hii ya ajabu kuhusu Sabato. Hata hivyo, jambo la kushangaza ni kuwa meneja huyo huyo alimwajiri kutokana na uaminifu wake. Wafanyakazi wenzake waliamini kwamba alikuwa akifuata dini ya Kiyahudi. Baada ya kubatizwa, aliacha kazi yake katika kampuni ya ujenzi wa mashua na akawa mwinjilisti wa vitabu mwenye ari na shauku kubwa, akisafiri sana hadi maeneo ambayo hayakuwa na watu. Kwa muda mrefu sana, aliua vitabu na kujifunza Biblia na watu kwa bidii.

Mara moja Napagi alikuwa akielekea Juba kutoka Western Equatoria kwa lori ambalo lilikwama kwenye matope nje kidogo ya Kanisa Katoliki. Akitumia vizuri fursa hiyo, alimtafuta kasisi mmoja na kumuuzia nakala ya *The Desire of Ages* na nakala ya kitabu cha *Radiant Health*. Siku iliyofuata alikamatwa na kufungwa huko Maridi kwa kuuza vitabu vya Kikristo. Mkuu wa polisi alichunguza vitabu vyake vyote na kusema, “Vitabu hivi ni vyema! Hatuwezi kuzuia ujumbe wa Mungu, Bw. Napagi, endelea kuuza vitabu vyako. Nipe taarifa mtu yeyote akijaribu kukuvuruga.” Ili kumlinda Napagi, ofisa huyo aliandika barua rasmi ili Napagi aweze kuuza vitabu hivyo katika majimbo mengine pia. Kando na uinjilisti wa vitabu, Napagi alikuwa pia msimamizi wa ujenzi wa makanisa. Alifanya kazi hii kwa kujitolea sana.

Mwanzoni mwa 1984, Napagi alitembelea nchi yake ya Uganda kutafuta mwenzi wa maisha. Alimwoa Sarah Nawita Ambrose mnamo Mei 25, 1984, katika kanisa la Waadventista Wasabato la Buwalasi na walikuwa na kubarikiwa kupata watoto watano, Ruth, Esther, Naomi, Enoch, na Rehab. Baada ya harusi, Napagi alirudi Juba na mkewe. Vita vya wenyewe kwa wenyewe vilipoanza tena na SPLA kutishia kutungua ndege za abiria ndani na nje ya Juba, Napagi aliamisha familia yake hadi Khartoum mapema miaka ya 1990. Alikuwa akitembelea Khartoum na miji mingine ya kaskazini kabla ya kuhamishia familia yake huko. Katika huduma yake yote, Napagi alijulikana kama mlei asiye choka, na aliyejitoea kwa kazi ya Bwana. Katika shauku yake

WAMISHIONARI WATANGULIZI WAZAWA AFRIKA MASHARIKI

Re-arranged and translated by Pastor Stephen Letta

ya kujua na kupanua injili, Napagi alianza kupokea na kusoma magazeti kutoka kwa huduma huru. Machapisho haya yaliathiri ufasiri wake wa baadhi ya unabii na kumlazimisha kuanza kuhubiri na kutoa semina. Pia alihubiri ujumbe wa Kurudi kwa Yesu mara ya Pili kwenye makanisa mengi yanayoshika Jumapili.

Ingawa Napagi alikumbana na matatizo makubwa ya kiafya, aliendelea kufanya kazi ngumu ya ujenzi na kuhubiri kila alipopata nafasi. Katika siku za mwisho za maisha yake, alilalamika kuwa na maumivu makali ya moyo. Mnamo Mei 30, 2002, Napagi alilala mauti bila kutarajia, na kuacha mke wake, watoto, na kanisa likiwa katika hali mbaya. Licha ya msiba huo, roho ya umishonari ya familia hiyo haikufifia. Mkewe, Sarah Nawita, alijiandikisha katika programu ya huduma ya kichungaji katika Chuo Kikuu cha Mashariki ya Kati na kufuzu kwa BA katika huduma ya kichungaji mnamo Machi 20, 2010. Alihudumu kama mkurugenzi wa huduma ya wanawake na watoto katika Fildi ya Sudan ya Kanisa la Waadventista wa Sabato.

Napagi anatajwa kuwa mtu mkimya, mchapakazi, na anayejitoa mhanga na ambaye hakupenda kujisifu kutokana na mambo anayofanikiwa kufanya, lakini alikuwa akiridhika kuona kazi ikifanywa. Ukubwa wa kazi yake ulidhihirika zaidi baada ya kifo chake kupitia majengo yaliyopo kwenye eneo zilipojengwa ofisi za Waadventista wa Sabato Munuki.